

**ATM: Tuduhan Nizar Tidak Berasas Dan Berbaur Hasutan
Bernama
26 April , 2012**

KUALA LUMPUR, 26 April (Bernama) -- Angkatan Tentera Malaysia (ATM) pada Khamis menyifatkan tuduhan tidak berasas anggota pembangkang Datuk Seri Mohammad Nizar Jamaluddin mengaitkan ATM dan Perdana Menteri dalam soal pilihan raya umum pada satu ceramahnya di Perak baru-baru ini berbaur hasutan.

Panglima ATM Jeneral Tan Sri Zulkefli Mohd Zin dalam satu sidang media di sini, berkata seluruh warga ATM kecewa dengan tuduhan Anggota Dewan Undangan Negeri Pasir Panjang itu kerana ia bermotif untuk menjejaskan kredibiliti dan imej perdana menteri serta ATM.

Mohammad Nizar yang juga Timbalan Pesuruhjaya PAS Perak dalam ceramahnya pada malam Isnin lepas dilaporkan mendakwa perdana menteri mengadakan pertemuan dengan semua panglima angkatan tentera dan meminta mereka melakukan sesuatu jika Barisan Nasional (BN) tumbang pada pilihan raya umum ke-13 akan datang.

Zulkefli berkata kenyataan berbaur politik dan hasutan sedemikian boleh menimbulkan kekeliruan di kalangan rakyat serta menjejaskan keselamatan negara.

"Dewasa ini wujud banyak pihak yang tidak bertanggungjawab dan berkepentingan yang sentiasa berusaha untuk meracuni pemikiran rakyat bertujuan bagi menghakis keyakinan masyarakat terhadap ATM dan kerajaan memerintah pimpinan BN serta tidak terkecuali individu tertentu dalam usaha melindungi politik mereka," katanya.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=662006>